



10. september 2021

UKA 2021/150

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Apeqquteqaat aallaavigalugu oqallisissiatut siunnersuutigineqarpoq, qanoq ililluta Kalaallit Nunaata politikikkut annerpaamik siammasinnerpaamillu nunanut allanut politikikkut tungasunut matumanilu aamma qallunaat naalagaaffiannut isumaqatiginninniarnernut tunngatillugu piginnaatitaaffeqarnissaa.

(Inatsisartunut ilaasortaq Anna Wangenheim, Demokraatit)

Demokraatit isumaqarput, nunanut nukittuumik ataqatigiissumillu nunanut allanut politikkeqassasugut, kialluunniit qularutigissanngimmagu, inuiaasugut tulluusimaarinnittut, nunarsuarmi ineriartornermut annerpaamik sunniuteqarusuttut – minnerunngitsumillu qanittutsinnut Issittumut ineriartornermut sunniuteqarusuttut.

Pivisusorsioartariaqarpugulli. Nunamut – inoqassutsimigut – mikisuusumut, soqutigisaqaqatigiinnik allanik suleqateqartariaqarpugut angusassat pitsaanerpaat anguniarutsigit. Issiaannarsinnaangilagut teqqequmi nuannareqqusaarutinillu nipituuliorluta. Imaassinnaavoq iluaqutaalaarsinnaasoq uagut nammineq nunatsinni politikkersinnit, nunanili allani suleqatitsinnut isumaqanngilluinnarpoq.

Sunniuteqarnerluuna Demokraatinut pingaarnerpaasoq. Nunanut allanut politikkami annerpaamik sunniuteqarniarsarissaagut, uatsinnut maani tunngassutilinnut, tasanilu assersuutitut qanittumi piginnaaneqarnermut isumaqatigiissutaasut Issittumi siunnersuisoqatigiit ataatsimiinneranni pitsaasutut nalilerpagut. Angusaq kusanartoq uagut Demokraatiniit piareersaaqataaffigisimasarput Naalakkersuisuusimasuni, tamatumalu kingorna naammassineqarlunilu maannakkut Naalakkersuisuusunit atsiorneqartoq. Sunniuteqarneq tamanna sinniisoqarnerup kinguneranik pilersinneqarpoq, aammalu Inatsisartut peqataatinneqarnerisigit. Taamaattuannartariaqarpoq, ajoraluartumilli takoreerparput naliginnaaleriartortoq, Naalakkersuisut kisermaassisut nunanut allanut politikkami. Inatsisartut annerusumik peqataatinneqanngillat. Tamanna Demokraatit allanngortinniarpaat.

Taamanna isumaqarpoq, Naalakkersuisut siullertut Inatsisartunik oqaloqateqaqqaasut politikkilinnginnermi sammisamut, suli oqartussaaffigineqalinngitsunut. Apeqquterujussuuvorli, qanoq ililluta tamanna qulakkeersinnaaneripput? Nunanut Allanut- Sillimaniarnermullu ataatsimiititaliaq pioreersoq apeqqutinut pingaaruteqartunut akuutinneqartassava? Nutaamik ataatsimiititaliussaagut, Inatsisartuni partiit tamarmik qanorluunniit mikitigigaluarunik peqataaffigisinnaasaannik? Partiini siulittaasut oqallittarfissaanik peqassava soorlu tamanna takoreeripput COVID-19-ip akiorniarnernani? Imaluunniit allarlunarmik pilersitsissaagut?

Tamassuma pitsaasumik sukumiisumillu uani Inatsisartuni oqallisigineqarnissaa neriutigaara. Aaqqiissutaasinnaasumik taakkartuerusunngilanga, isumaqarpungali, sapinngisamik ilusilersuissasugut, nunanut allanut politikkitta siammasinnerpaamik politikikkut piginnaatitaaffimmik tunngaveqartumik qulakkeerinntumik. Taamaaliornermi qularnaarneqassaaq, Inatsisartuni amerlanerussuteqartunit ilalernerqarnissaq Naalakkersuisut nunanilu allani suleqatit akornanni isumaqatiginninnialinnginneranni.



Naggataatigut minnerunngitsumillu qularnaarnejassaaq, annertuumik pinngitsoortinneqassamat, assigiinngisitaartunik avammut nalunaaruteqarnerit, naggataatigut nunatta isigineqarneranik innarliisinnaasut.

Oqallisissiamut siunertaanerpaavoq qulakkiissallugu, Naalakkersuisut qaqugukkulluunniit nunanut allanut politikikkut isumaqatigiinniarnerni aammalu nunanut allanut politikikkut aaliangiinnginnerni, amerlanerpaanik tunuliaquserneqarsimanissaat.

Oqallisissiamut isummat Naalakkersuisunit partiinillu allanit tusarnissaat qilanaaraara.